

財政

二百三十

九月

處原奏均令在部庫上免無論何省概不准援照奏請臣部所收此項捐款均應專款存儲以備練兵之用至捐復條款頭緒紛繁如有未有盡事宜再行商定具奏謹 奏奉 旨依議欽此

戶部議覆開辦廣西實官等項捐輸或借用洋款摺

署兩廣總督岑春煊電奏本日奉十一電 旨飭仍往桂柳一行遵於十三日由梧起程往省與柯撫會商一切後即往柳州督飭各軍迅速剿辦惟自柳郡勇變省城戒嚴柳慶兩屬防營多半調往省城防堵西省本邊瘠之區此次柳郡變亂菁華頓失戶部前撥各省協餉解到寥寥即能掃數解清亦難足用柳慶各營之餉轉瞬即無可開支萬不得已惟有籲懇天恩 特旨允准由粵開捐實官一切捐章皆照戶部議覆政務處籌餉條款辦理只在兩廣地方設局勸辦不在別省設局招徠捐足一百萬兩即行停止雖原議有不准援照之說而廣西正值用兵之際與別省情形不同萬一部議難行則懇請 天恩准由廣東自借洋款一百萬兩仍由廣東自行分年籌還以濟急需而維大局不勝迫切待 命之至等語光緒三十年六月十五日奉 旨著戶部速議具奏欽此欽遵由軍機處鈔交到部臣等伏查廣西土匪連年擾攘迄未一律肅清前據該署督等先後奏請撥提籌給的款緩解新舊

洋款並攤派各省協餉及開辦餉賑捐輸統計所收各款銀兩爲數當亦不少值此異常支絀之時臣等百計圖維實已不遺餘力如果剿辦得手何致日久蔓延今柳州勇變省城戒嚴若不即早殲除儻再稍有疏虞恐不可收拾南疆大局攸關後患何堪設想該署督現因兵餉無可開支以捐實官借洋款爲請情詞迫切自係萬不得已之舉臣等熟權事勢之緩急利害之重輕與其借洋款而易滋流弊不如開捐輸以藉裕餉源雖臣部先後議覆政務處推廣收捐各條原爲練兵籌餉而設惟現在廣西兵事方殷餉需孔亟不得不稍事變通擬除捐復各條及報効鉅款並本無實官不准收捐外其實官捐應陸之階暨遇缺先花樣兩項捐款應准暫收如蒙 俞允由臣部酌定應行增減成數詳細章程行知遵照辦理此係因廣西軍務吃緊始爲此權宜之計仍照原奏收足一百萬兩卽行停止以示限制此外無論何省概不得藉詞援引該省亦不得再請加增該省既得捐輸大宗進項措置自易雖一時未能湊集而有此切實抵款當不難於騰挪相應請 旨飭下該署督乘此餉需應手詳審機宜悉心調度嚴飭各將領迅速奮勉圖功尅日蕩平毋再玩寇糜餉致干重咎是爲至要謹 奏奉 旨依議欽此

直隸總督袁奏推廣鼓鑄以資周轉摺

財政

二百三十一

甲辰